

## 每週經課朗誦經文(巴克禮漢羅/教羅)2013/08/25

### 共同經課 - 1 耶利米書一章四節~十節

4 耶和華 ê 話臨到我，講，5 我未創造你 tī 腹肚內 ê 事先，我 bat 你；你未出胎 ê 事先，我分別你做聖；設立你做列國 ê 先知。6 我就講，害 ah！主耶和華 ah，你看，我 boē 曉講，因為我是 gín-ná。7 總是耶和華對我講，你 m̄-thang 講，我是 gín-ná；因為我見有差你，你 tiòh 去；我見有吩咐你，你 tiòh 講。8 你莫得驚 in，因為我 kap 你 tī-teh，beh 救你；這是耶和華講 ê。9 耶和華就伸祂 ê 手摸我 ê 嘴。耶和華 kā 我講，你看，我有將我 ê 話，hē tī 你 ê 嘴。10 看 ah，今 á 日我設立你 tī 列邦列國 ê 頂面；是為 tiòh beh 拔出，beh 拆毀，beh 敗壞，beh chhia 倒，beh 建立，beh 栽培。

### 共同經課 - 2 詩篇七十一篇一節~六節

1 耶和華 ah，我 oá 靠你，求你 hō 我永永無見笑。2 照你 ê 公義拯救我，hō 我脫離；À<sup>n</sup> 耳孔聽我，來救我。3 求你做我 thang khiā 起 ê 石磬，hō 我常常去 tiàm hia；你已經命令 beh 救我。因為你是我 ê 山巖，我 ê 山寨。4 我 ê 上帝 ah，求你救我脫離 phái<sup>n</sup> 人 ê 手，脫離不義 kap 殘忍 ê 人 ê 手頭。5 因為主耶和華，你是我所 òng 望-ê；Tùi 我少年 ê 時你是我所 oá 靠 ê。6 我 tùi 胎裡 hō 你扶持，hō 我出老母 ê 腹肚 ê，是你；我 beh 常常 o-ló 你。

### 共同經課 - 3 希伯來書十二章十八節~二十九節

18 Ta<sup>n</sup> lín 所到 ê m̄ 是能摸得有火燄 ê 山，kap 密雲、烏暗、大風，19 號頭 ê 音，言語 ê 聲；聽見 ê 人求莫得 koh kap in 講；20 因為所命令 ê，in 當 boē-tiâu，是講，就若走獸 oá-tiòh 山，也 tiòh 用石頭 tím 死；21 koh 所看見極其 thang 驚，致到摩西講，我不止驚到 ngiàuh-ngiàuh-chhoah；22 獨獨 lín 所到 ê 就是郇山，真活上帝 ê 城，天頂 ê 耶路撒冷，萬萬 ê 天使，23 hiah-ê 有名記 tī 天裡 ê 大 kiá<sup>n</sup> ê 聚會 kap 公會，審判眾人 ê 上帝，得 tiòh 齊全 ê 義人 ê 靈魂，24 新約 ê 中保耶穌，kap 所 hiù ê 血，chit-ê 血所講 ê 比 A-pek khah 好。25 謹慎莫得拒絕 tùi lín 講 ê。因為 tī 地裡來傳命令 ê，若拒絕伊，尙且 boē 會逃閃，何況咱違背 tùi 天傳命令 ê ah？26 當時伊 ê 聲 hō 地振動；但是 ta<sup>n</sup> 有應允講，iáu 有一 pái 我 m̄-nā hou7te7:3 搖 choah，亦 beh hō 天搖 choah。27 所講，iáu 有一 pái，是指明受振動 ê 物，就是受造 ê 物，beh tú-tiòh 遷徙，hō hiah-ê 無受振動 ê 長長 tī-teh。28 所以咱得 tiòh boē 會振動 ê 國，tiòh 有恩惠，thang 用虔誠敬畏來服事 hō 上帝歡喜；29 因為咱 ê 上帝就是燄燄 ê 火。

### 共同經課 - 4 路加福音十三章十節~十七節

10 安歇日耶穌 tī 一個會堂 teh 教示人；Il tú-tng 有一個婦人人，患 tiòh 邪神致病十八年久，ún-ku lóng boē 伸直。12 耶穌看見就叫伊講，婦人人 ah，ta<sup>n</sup> 你脫離你 ê 病 lah。13 就用雙手 kā 伊 hoā<sup>n</sup>；伊即時伸直，就歸榮光上帝。14 管會堂 ê，因為耶穌 tī 安歇日醫病，就受氣，對眾人應講，有六日應該 tiòh 做工，hit 六日間 thang 來受醫；安歇日 m̄-thang。15 但是主應伊講，假好 ê 人 ah，tī 安歇日 lín kiám 無 ták 人 tùi 槽裡 tháu 伊 ê 牛 á 是驢，牽去食水 mah？16 Chit-ê 婦人人是亞伯拉罕 ê 後裔，hō 撒旦縛伊已經十八年久，Kiám m̄ 應該 tī 安歇 ê 日 tháu 伊 ê 結 mah？17 耶穌講 án-ni，chiah-ê 對敵 lóng 見笑；眾人因為伊所行一切榮光 ê 事，lóng 總歡喜。